




von furcht oder hoffnung reden/ brauchen sie
solcher wort/ das dir kein Mahler also könnte
die furcht oder hoffnung abmahlen/ vnd kein
Cicero oder Redkündiger also fürbilden.

Vnd (wie gesagt) ist das das allerbeste/
das sie solche wort gegen Gott vñ mit Gott
reden/ welches macht/ das zwiefeltiger ernst
vnd leben in den Worten sind. Denn wo
man sonst gegen menschen in solchen sachen
redet / gehet es nicht so starck von hertzen/
brennet / lebet vnd dringet nicht so fast.

Daher komets auch / das der Psalter al-
ler Heiligen Büchlein ist/ vnd ein jeglicher/
in waserley sachen er ist/ Psalmen vnd wort
drinnen findet/ die sich auff seine sachen rei-
men / vnd ihm so eben sind / als weren sie
allein vmb seinen willen also gesetzt/ das er
sie auch selbs nicht besser setzen noch finden
kan / noch wünschen mag.

Welches denn auch dazu gut ist / das /
wenn einem solche wort gefallen / vnd sich
mit im reimen/ das er gewiss wird/ er sey in
der gemeinschaft der Heiligen/ vnd hab al-
len Heiligen gegangen / wie es ihm gehet/
weil sie ein liedlein alle mit ihm singen /